

Telegram cunsumadëures lugio-agost 2015

Bonus sozial por l'eletrizité y le gas: ma danter le 40% y le 53% dles families che á le dërt s'un anüza efetivamënter

ZCS: al vá debojëgn da fá valch cuntra la "meseria d'energia"

DI 2014 á ma le 40% dles porsones cun chësc dërt anuzé le bonus sozial por l'eletrizité. Le bonus dal gas é indere gnü adoré da presciapüch le mez (53%). Chësc é le resultat de n'inrescida che é gnüda fata dan da püch dala Zentrala di Consumadus dl Südtirol (ZCS).

La ZCS recorda che le bonus sozial é ponsé dantadöt por families cun tröc mituns y che á debojëgn de n aiüt economich. Les families mëss:

- ester titolares de n contrat de fornidöra d'eletrizité o de gas y
- ne davagné nia deplü co na certa soma: detlaraziun ISEE sot 7.500 euro (o sot 20.000 euro cun trëi mituns a ciaria).

Implü á ince les families che convir cun na porsona che á de gran problems sanitars y á debojëgn de aparac eletro-medejinai le dërt da s'anuzé dl bonus por l'eletrizité.

Chisc é i imporc odüs danfora por le 2015

- da 71 euro a 153 euro por le bonus eletrizité
- da 173 euro a 623 euro por le bonus eletrizité por aparac eletro-medejinai
- y da 33 euro a 297 euro por le bonus gas (raiuns climatics E y F tl Südtirol).

De plü informaziuns pón ince ciafé ti Comuns y ti zëntri por la zitadinanza o ti zëntri de sostëgn por la detlaraziun dl davagn (CAF), sciöche ince pro les aziëndes dla forza eletrica

Fatures falsificades dl Enel tres e-mail

Tó y jí l'e-mail y nia cliché sön i links: ara se trata de programs danusc

Dötaurela ciafa cotan de consumadësses y consumadus dl Südtirol fatures dl Enel tres e-mail. Tla e-

mail él le numer dla fatura, le codesc dl cliënt, n codesc fiscal (falz), l'import dla fatura y la scadënza.

Dessot él spo l'indicaziun ch'an pó desciaré la fatura sc'an clichëia sön n link injunté.

Sön domanda dla Zentrala Consumadus dl Südtirol confermëia l'Enel che chëstes fatures é falzes. Le link condüj a na plata web fasificada y chëra ch'an mina che sides na fatura é pordërt n virus, che blochëia düt i dac sön le computer. Le fin é chël da sforzé la vitima da paié scioldi por se cumpré i dac y sbloché indô le computer.

Porchël él da ignoré chësta sort de e-mails, les tó atira y jí y da ne cliché te degun caje sön le link!

Sharing Economy: cultura y marcé dl partí

Novités dal De dl Consumadú di Païsc Todësc

Al scomenciamënt de messé á le Diretur dla Zëntrala di Consumadus (ZC), Walther Andreaus, tut pert al De Nazional dl Consumadú a Berlin ti Païsc Todësc. L'argomënt dl de é sté la “sharing economy”, chël ó dí partí les cosses: al n'é nia n ponsier nü. Te familia, danter compagns, mo ince tles cooperatives él bele l'idea dla condivijuun. Cun la digitalisaziun che crësc crësc ince le potenzial, y la cultura dl “sharing” se trasformëia bel plan te n dër marcé. Sce an partësc vára da davagné y sparagné ressurses y avëi tl medemo tëmp n'alternativa al marcé classich. Al se forma inscio ofertes nöies y ocajuns nöies – mo ince prighi nüs: de mendri standarg, malsegurëza dl dërt y na dependëenza che crësc dales plataformes tla rëi che se svilupëia tresfora. Na sfidada nöia por i consumadus y por la sconanza di dac.

Le De dl Consumadú a Berlin á mostré che sce la “sharing economy” nöia se confermará sciöche marcé nü, messará i consumadus savëi da se möie y avisa porchël, messará l'economia y la politica cherié les condiziuns generales a na moda che la “sharing economy” sostëgnes davëi de miú ofertes, la sconanza dl ambiënt y la comunanza, zënza vëne fora tl medemo tëmp segurëza, resservatëza y le sëns zivich de düt.

“Sparagné sön la ciasa”: model interessant dantadöt por la classa mesana mo an mëss tó demez i limic d'azes che reverda l'eté

Te tëmps de malsegurëza sön i marciá finanziars pól ester n bun investimënt, sciöche ince n sostëgn por la previdënsa, da cumpré na ciasa o n apartamënt. Le tru por fabriché o compré “cater mürs” é sovënz ri y, por tröc, colié ince a renunzies. N aiüt messess rové dal model nü “sparagné sön la ciasa”, ajunté dan da püch dala Provinzia. Chësc model colieëia la ponsiun integrativa al “sparagné sön la ciasa”, conzedon ai scric ite a fonds de ponsiun complementars l'azes a imprësc alisirá por frabiché, cumpré y ressané la próma ciasa. Por che davagna indere püch é l'opziun indere manco interessanta.

La ZC arata val' de positif che le tas é gnü fissé al 1,5%. Le model podess ester interessant ince por i jogn. Nota negativa: i limic d'eté por l'azes al model. Le limit di 55 agn n'é nia da capí. Ajache le model prevëiga danter i obietifs d'adoranza dl imprëst ince le ressanamënt dla próma ciasa, foss la fascia di over 55 foss öna de chères plü interessades da chësta possibilité. Porchël ne vál nia debojëgn da mëte de te limitaziuns; chësc foss atira da mudé.

Stipendiums por la formaziun post-universitara: degöna esenzion fiscala gnanca cun l'arat d'l'Agenzia dles Entrades

La Provinzia Autonoma de Balsan conezed stipendiums por la formaziun post-universitara. Sön la plata internet dla Provinzia él gnü publiché na comunicaziun da chéra che al resultëia che sön chisc stipendiums ne paion nia le IRPEF, aladô dl arat di 26 de jügn dl 2012, che reverda l'interpretaziun dl art. 50, coma 1, lëtra c), dl DPR n. 917 dl 1986, scrit dal'Agenzia dles Entrades (ciara injunta).

Cun na süa lëtra di 05.09.2012 á la Provinzia Autonoma ince spezifiché che ince che che á ciafé stipendiums post-universitars dan le 2012 y á paié ite por chëstes somes les cutes, á la possibilté da damané zoruch i scioldi al'Agenzia dles Entrades, o tres le model UNICO, ti termins preodüs.

Tla pratica ciarera indere fora atramënter:

che che á damané zoruch i scioldi ne i ciafa nia dala Agenzia dles Entrades;

che che á dé jó le model UNICO y n'á nia injunté pro la basa imponibla dla cuta sön le davagn i stipendiums ciafá, ciafa da paié do les cutes cun fic y sanziuns.

Cun na lëtra daverta á la ZC damané ai ënc competënc na soluziun dla chestiun.

De plü informaziuns é da ciafé chiló: www.centroconsumatori.it.

Acordanza sön la sospenjiun dles rates dles Assoziaziuns consumadus cun l'Abi ZCS: les banches dl Südtirol "boicotëia" chëst'acordanza tan importante

Sciöche al é bele gnü lascé alsavëi dan da püch él gnü stlüt jó danter l'ABI y les Assoziaziuns di consumadus n'acordanza che vëiga danfora "la sospenjiun ma dla cuota de capital por alplü 12 mëisc por credic al consum cun na dorada de plü co 24 mëisc y por i imprësc garantis da n'ipoteca sön la ciasa prinzipala".

L'ABI á publiché dan da n valgëgn dis la lista dles banches che tol pert, y al vëgn ince dant n valgönes banches locales: la Banca de Trënt y Balsan, la Cassa dl Sparagn, la Cassa Raiffeisen dl'Alta Val d'Isarch, y n valgönes banches nazionales sciöche la Unicredit, la BNL, l'Intesa Sanpaolo y les Casses Raiffeisen desvalies dl Trentin. Nia sön la lista ne n'é les Casses Raiffeisen dl post y gnanca la Banca Popolara dl Südtirol. Te tëmps de crisa é chësc n bur sëgn: por tröpes families che á n imprëst da paié jó foss na sospenjiun dl paiamënt dl capital de 12 mëisc n gran aiüt.

De plü informaziuns sön la possibilté de sospenjiun dles rates é da ciafé tl sorvise de consulënza dla Zentrala Consumadus dl Südtirol (prenotaziun al numer de telefon: 0471-975597).

Detraziun dl 65% por sistems de proteziun cuntra le sorëdl

I sistems de proteziun cuntra le sorëdl che pó gní trac jó dala cuta mëss, aladô dles indicaziuns dl'ENEA (Agenzia nazionala por tecnologies nöies, energia y svilup economich sostenibl), avëi chëstes carateristiche:

- ai mëss tigní dalunc le sorëdl dai vidri, chël ó dí ciaré che le sorëdl ne pëtes nia ite diretämënter sön le vider tratan i mëisc da d'isté por ch'al ne se surascialdes nia;
- ai mëss fá pert dl frabicat y ester döt un cun chësc; sistems lëdi che pó gní tuc demez dal utilisadú, sciöche por ejëmpl n paiun (Pavillon, gazebo) ne pó nia gní trac jö dala cuta;
- ai pó gní metüs sö dala pert daite o defora di vidri o ester integrá ti vidri;
- ai mëss ester mobii (chël ó dí da podëi stlüje, daurí o mené ia y ca) por ne lascé nia peté ite le sorëdl, sc'al é debojëgn, o por lascé ite le sorëdl tratan i mëisc da d'invern;
- al vögn reconesciü dük i sistems por fá scür sciöche por ejëmpl rolos, venezianes y i.i.
- pro i sistems che n'é nia combiná diretämënter cun le vider ne pó chi che ciara cuntra nord nia gní trac jö dala cuta.

En general velel chësc: la detrata vel ma por frabicac che é bele. Ince tl caje di sistems de protezjun cuntra le sorëdl mëss la detrata dala cuta gní partida sö te 10 rates anuales anfat; l'import mascimal da podëi trá jö é de 60.000 euro, o de 6.000 euro al ann.

De plü condiziuns y informaziuns ciafëise sot a www.verbraucherzentrale.it.

50% de detraziun dla cuta por cumpré climatisadus

Che che cumpra le climatisadú tl cheder de d'atres mosöres de ressanamënt, pó trá jö le 50% dl investimënt dala cuta sön le davagn. I “gragn aparac por la ciasa” mëss gní cumprá adöm cun d'atres mosöres de ressanamënt por chères che al vögn damané la detraziun dl 50%, chësta é la condizion por podëi s'anuzé dl bonus mebli, pro chël che al alda ince i climatisadus. La soma mascima é de 10.000 euro; la detraziun mascima é porchël de 5.000 euro, da partí sö te 10 rates anuales costantes.

Al pó gní trat jö sides i ventiladus eletrics che i climatisadus che ti corespogn ala classa de efiziënsa energetica A+.

Implü mëss le paiamënt gní fat tres banca o posta, o tres cherta bancomat o de credit (cfr. zircolara dl'Agenzia dles Entrades n. 29/E di 18.09.2013)